

So mit würt abgon bald die ler
Dann kunst gespysset würt durch ere/
Vnd wann man jr keyn ere düt an
So werden wenig dar noch stan/
Der abblas ist so gantz vnwärt
Das nyemā dar noch frogt noch gārdt
Nyeman will me den abbloß süchen
Jo mancher wolt in jm nit flüchen
Mancher gāb nit eyn pfening vß
So jm der abbloß kumbt zū huß
Vnd würt jm dar zū kumen doch
Er reycht inn verrer dann zū Och/
Dar vmb es vns glich also gat
Als denen / mit dem hymel brot
Sie woren des so gar vrtrüz
Sie sprochen / es wer inn vnnüz
Ir sel / vnwillen dar ab hett
Vnd machten dar vß eyn gespött/
Als düt man mit dem apploß ouch
Der würt veracht / durch mächē gouch/
Dar vß nym ich mir eyn berycht
Jez stünd der gloub glich wie eyn lyeht
Wann das will gantz verfaren hyn
So gibt es erst eyn glantz / vnd schyn/
Das ich es frylich sagen mag
Es nah sich vast / dem jungsten tag
Sidt man das lyeht der gnad veracht
So würt es bald gantz werden nacht
Des glichen vor nie würt gehört
Das schiff den boden vast vmbkört

